

CBETA電子佛典集成

CBETA Chinese Electronic Tripitaka Collection
eBook

J36nB358


智 覃正禪師語錄

清 最正說 尚能・尚瑩等編

末附助緣耆德

財團
法人

佛教電子佛典基金會



目次

- [編輯說明](#)
- [章節目次](#)
 - [目錄](#)
 - [上堂](#)
 - [佛事](#)
 - [讚](#)
 - [拈古](#)
 - [頌古](#)
 - [聯芳](#)
 - [天序能上人](#)
 - [機先瑩上人](#)
 - [偈頌](#)
 - [次韻山居](#)
 - [山中四儀](#)
 - [牧牛頌](#)
 - [尋牛](#)
 - [見跡](#)
 - [見牛](#)
 - [得牛](#)
 - [牧牛](#)
 - [騎牛到家](#)
 - [忘牛存人](#)
 - [人牛俱忘](#)
 - [返本還源](#)
 - [入廬垂手](#)
 - [十二時歌](#)
 - [黃龍三關](#)
- [卷目次](#)
 - 1.
- [贊助資訊](#)

編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

智覃正禪師語錄目錄

- 目錄
 - 上堂
 - 小參
 - 示眾
 - 法語
 - 像讚
 - 拈古
 - 偈頌
 - 雜著

智覃正禪師住安陸府西來禪寺語錄

門人尚(能瑩)等編

康熙庚申歲師在首座寮十月十五日監院密宗大師領兩序暨眾檀護公啟請繼席進方丈師據室云諸人還識麼乃歷代祖師天下老和尚懸肘後符握三要印驅馳佛祖號令人天仰本師接引後昆續佛慧命底所在且道山僧今日又作麼生施設拈拄杖卓一卓喝一喝云輓毬豎拂還拈槌默照邪禪望風靡便起。

即日開堂結制師至座前於諸護法手中接疏示眾云無量妙義個裏流出雖然文彩已彰更煩維那宣過宣畢指法座云從上老古錐坐此寶華王座諸人若也不信山僧起模畫樣去也遂陞拈香云此一瓣香結為蓋覆被大千散為雲潤流沙界熱向寶爐端為祝延今上皇帝聖躬萬歲萬歲萬萬歲恭願聲清河海天下歸仁次拈云者瓣香融通三際橫亙十方奉為滿朝文武闔國公卿道府縣各衙列位尊官伏願恒居祿位永作金湯復拈云者瓣香天無私覆地無私載敬為合郡紳士在筵檀護列刹高賢同門昆季本山耆德兩序等伏願心心不昧般若正因念念常懷金剛種智再拈云者瓣香二十餘年提不起放不下只得勞形費履坐臥無由末後撞著個無面目老和尚當頭痛與頓棒自從觸碎從空放下今對人天眾前拈出耑伸供養現住襄陽府百丈山黃龍堂上傳臨濟正宗第三十四世秀野林大和尚未論報德酬恩且要盡大地人咸知氣息斂衣就座景齊大師白椎云法筵龍象眾當觀第一義師云當場敵勝須是英靈觀體提持還他作者眾中莫有作者麼試出相見玄機問今日結制人天普集祖令當機如何舉唱師云據虎頭收虎尾進云中間事作麼生師云無繩自縛漢進云毗婆尸佛早留心直至如今不得妙師云幾行崖下路不見白頭人僧禮拜師乃拈拄杖云正法

眼藏亙古亙今般若真燈照天照地當陽無向背直下絕承當廓爾現前絕聞絕見常在一切處非離一切時這裏見得悉皆具足建化門中斯為可矣若是向上一著直饒三世諸佛不敢安名千眼觀音窺覷不見那更有結有解有迷有悟大似為蛇添足好肉剜瘡新西來今日一時掃卻何故惟憑者箇真消息長與南山祝聖恩復舉大慧杲上堂云即心是佛佛不遠人無心是道道非物外三世諸佛只以此心說法只以此道度生以此道度生無生可度以此心說法無法可說無法可說是真說法無生可度是真度生當知三世諸佛亦如是現前大眾亦如是師云智上座則不然真心無住真照獨存真性絕攀緣真見不由境遂以拂子豎起云見麼擊禪床云聞麼即此見聞非見聞無餘聲色可呈君上首結椎云諦觀法王法法王法如是下座(敘辭不錄)。

佛誕日善士李君林胡楚軒率眾檀信設齋請上堂應跡王宮克紹隆周行七步獨稱雄指天指地猶閒事目顧四方大脫空遂豎拄杖云釋迦生來在山僧拄杖頭上放光現瑞普照大千世界諸人還見麼若喚作釋迦又是拄杖若喚作拄杖又是釋迦若是靈利衲僧未舉早能委悉何煩世尊指天指地說黃道青西來恁麼提持拄杖唯應自喫還委悉麼當陽一默顯全提古今只有維摩詰茲者眾檀越各捐淨財慶佛華誕三年圓滿禮千佛懺敬雕達磨祖像一尊今就斯辰登座仍敦請山僧上堂顯揚功德誠哉功德真實不虛更聽一偈以酬合會三年慶佛信心濃姦子姦孫壽莫窮曩劫靈山曾授記生生世世悟心宗下座。

結制本鎮李翠之李玉卿徐德宇安會明眾居士等設齋請上堂拈拄杖云十方同聚會選佛場弘開鼓作家爐鞴握本色鉗槌若凡若聖情與無情盡教冰消瓦解皮穿骨露脫體風流渾無巴鼻直得頭頭顯露法法全彰放去收來不假外求一機透徹千途萬轍同歸一道坦然三賢十聖齊赴火不待日而熱風不待月而涼洞空劫之本有盡今時之自得不須九旬結制何勞百期參尋汝諸人會麼更聽一偈靈然突出自心王把斷要津除禍殃豎四橫三全體用七通八達豈囊藏卓拄杖下座。

解制上堂揮拂云神光一道照天照地包羅萬有融貫諸塵山僧今日解制任爾衲僧逍遙走遍天下遊盡五湖水月一同風景不別若也見得十世古今始終不離于當念無邊剎海自他不隔于毫端人人常光現前個個頂天立地到者裏結也在裏許解也在裏許雖然如是且道不解不結一句又作麼生舉揚良久云無相光中呈舊面一番拈出一番新下座。

解制上堂師云春風吼木江山秀指點西來第一機諸公還識第一機麼不妨對眾道看僧問乾坤之內宇宙之間中有一寶請問寶在甚麼處師云形進云寶已蒙師指示解制一句事如何師云空進云無蹤無跡受用箇甚麼師云用僧擬議師便打僧禮拜歸位乃云擊開關鍵大地回春一段光明人人本具不須九旬籠絡何定百期制滿雖然如是到者裏雖是有出格底衲

僧脫體承當可爾大眾且道解制一句作麼生道湖光倚杖三千頃山色開門五六峰下座。

淨極大師慈雲禪人率眾禪德居士等供法衣上堂師云上品金襴畦相分明良工巧手蜀錦製成佛佛授受祖祖相傳所以迦葉捧歸雞足山俟彌勒下生怙體脫不下盧老持藏大庾嶺置在石上盡力提掇不起此二尊者一人滯貨不出門一人賣弄亦不少怎似諸公今日覲面相呈光揚祖道遂拈衣示眾云法衣表信古今傳列祖風規自顯然敢問大眾如何是利人天底句良久云無限苾芻爭聚集左肩偏覆為敷揚下座。

師誕辰淨極大師慈雲禪德率眾設齋請上堂拈香竟僧問昨夜秋風透體涼今朝杲日正當陽杲日當陽即不問覲面相呈事若何師云突出難辨進云滿堂俱龍象因甚麼鼻孔不撩天師云鉤在不疑之處進云今日慶祝五旬頭請師說法賀千秋師云壽量原無量乃云今朝七月廿一吾乃正交五十父母未生面孔人人仰望不及今日只得為蛇添足節本生枝所以道本來無生從無生中現有生本來無相從無相中現有相遂豎拂子云大眾會麼於此會得箇中纖塵不立直下覲體全真祇如最正砣砣意於此道親侍上秀下野本師一十六年幾番骨露皮穿身心剔脫到者裏不屬漸次不假修持能為萬象主不逐四時凋雖然如是且道父母未生已前諸公還知山僧年紀大小鼻孔長短麼是有生耶無生耶應世耶出世耶復拂云指揮拂子天花落收放同時妙體彰下座。

春日上堂僧問處處真處處真塵塵盡是本來人本來人即不問春魁獨占意如何師云斬新日月特地乾坤進云五九盡時春體露且道今日露個甚麼師云日轉上林鋪地錦子規聲裏勸人歸進云一句輝今古全提事如何師云頭頭至理同源進云二邊俱不立中道不須安畢竟在甚麼處師便打僧便喝師復打乃云今朝五九盡宇宙咸回春澗底梅開放堤畔翠柳青和風出洞口杲日解凝冰所以道花明柳碧非他物燕語鶯啼盡正音諸人還委悉麼拂一拂云等閒識得東風面萬紫千紅總是春。

韋馱登座開光寶杵威嚴魔軍膽散面佛慈立輔鎮叢林遂舉筆云諸人還見普眼菩薩麼若也見得大千界在毫端上不二門開接雲水。

黃龍奇然老和尚塔前上供百丈峰巒雲靄靄襄江漢水渺茫茫一輪杲日當空照大地山河普放光驀豎拂子云大眾各具一光即且置祇如百丈山前乃是我師翁二十餘載入纏垂手高豎法幢闡揚法化全提祖印布縵天網打鳳羅龍四眾臨筵萬指圍繞正所謂經綸垂處無他意一得錦鱗即便歸然雖如是且道無縫塔前以何為念不肖法孫拈瓣旃檀爇向爐中耑伸供養以表祝哀插香云惟憑此炷聊為敬不盡傾忱一瓣香遂作禮退。

癸亥孟冬望六日造普同塔完師至塔前拈拄杖指云這座浮圖乃比丘比丘尼優婆塞優婆夷四眾人等臨末稍頭藏身所在今朝吉旦良辰圓功結頂就中舉揚上頂佛事卓一下云會麼盡大地是個無縫塔眾中還有人見麼於是見得無時不露覲面全彰茲者本師率兩序大眾列剎禪德十方眾

姓居士等各捐淨財建此普同壽塔可謂緣因即是了因種作福還須有福人且今日功畢安頂一句作麼生道玲瓏寶塔垂千古頂上常輝萬道光遂上頂。

中秋示眾揮拂子云還委悉麼秋色平分桂魄圓清光可愛渾無邊滿堂龍象競頭看眾曜潛輝孤月懸達磨祖師開光金剛體堅密身光晃耀顯分明遂舉筆云正法眼毛穎尖頭直下看便點。

薦寂空禪德對靈小參四大分離妙明不滅真光獨耀八面無遮歷萬劫而常然遊千生而自在所以蓋天蓋地輝騰今古佛祖觀之無門鬼神測之難解到這裏生也不到死也不到赤灑灑淨裸裸遂豎拂子云只在山僧拂子頭上大眾還見寂公麼個裏會得覲體全彰設或未然更為指出騰身一擲太虛外鼻孔依前搭上脣。

為萬壽寺瑞林禪德對靈小參傷哉痛念瑞林公處世為人無有二毘尼清淨護明珠六度行門難可比公自兵燹清平二十餘年不憚勤勞萬行莊嚴秉授具圓參悟本領培植叢林道心愈固提綱紐領雄雄據堅重修萬壽梵剎鼎建白雲寶所兩處瓊樓玉殿鏤莊滿堂金相金碧交輝煥然改觀斯當功行圓滿正好安閒享壽豈知耳順之年世緣謝脫忽焉殂落令人淚出痛腸幻軀生來死去英雄傑士難免且道瑞公即今在甚麼處安身立命良久云諸人若也見得終日行則同行坐則同坐如其未委聽取一偈六十年來驀轉身踏翻藏海起紅塵故園歸去秋光好蕩相渾無物比倫。

尚景如心尚溥性悅為師入塔請對靈小參頭頭盡是毘盧藏在在皆為極樂城觸目菩提真解脫千紅萬紫一般春五靈今日同歸塔拄杖芒鞋側耳聽正所謂昔日生本非生全體恁麼來今日死本非死全體恁麼去既然如是且道淨極大師立宗禪德元宗禪德覺光戒德優婆夷楊定德即今在甚麼處響豎起拂子云還見麼者個是色復呵呵大笑云者箇是聲畢竟真體在什麼處繡出鴛鴦無背面不知誰解覓金針遂炷香奠茗。

入塔托起靈骨云無縫豁開非內外牢關把定絕毫釐那邊別有真消息只許英靈獨棲遲便入隨手掩戶云葉落歸根不留朕跡。

為龍興寺見明禪德追悼小參序屬三秋遍界涼傲霜金菊最幽香真機展演當陽露觀面全提不覆藏所謂淨智妙圓本無來去生亦不生滅亦不滅萬古徽猷神光烜赫所以天不能蓋地不能載日月不能照風雨不能壞驀拈拄杖云見公在山僧拄杖頭上與諸公相見了也還信得及麼若信得及當下便安心其或未然海枯終見底人死不知心適來恁麼道不可徒然山野今日更開一路與諸公親見本來面目復呈拄杖云山僧棒上親薦得塵毛剎海露堂堂為靜虛披剃師入塔設供拈香云常光獨露輝古耀今無縫一塔自古城陰恭惟我師恒修淨業德行清高享天年七十七春示滅如生顏不改打破生死關坐斷涅槃路不肖傾欵無盡意三片爐香誠可格遂作○⊖[○@ |]⊕◎何處不現身托襯云得壽得名空人忘我本無一物自性天然泯心脫體超塵域金骨安慰坐翠堵。

為靜虛明先師掃塔設供拈香云吾師自己光明藏個裏往來非往來自古至今常烜赫無修無證絕縈迴不肖拈香拜掃奚異更生節日當年一點神機而今盡與埋沒今日無端與麼道勿令淨地輥塵埃炷香云顯。

讚

香巖宕老和尚像出世香巖傳臨濟宗張縵天網打鳳羅龍深入虎穴奪得虎子換作祖師玄妙訣非心非佛又非物不是興家是滅門殃及兒孫何日了咦黃龍奇老和尚像雙池白水吾祖獨能繼祖武寶山百丈大開爐鞴提鉗錘朝鐘暮鼓無停時舌端滾滾波滔涌棒頭惻惻如雨點莫道分明賞罰伊。

西來本師秀老和尚像高踞曲条橐籥濟宗單傳直旨一義俱空據虎頭收虎尾言有響句藏鋒任他天下禪和子覲面驚然立下風不肖狹路相撞著親遭一喝兩耳聾雖然如是得來不假資熏力顯出非煩啟迪功。

拈古

舉釋迦牟尼世尊初降生一手指天一手指地周行七步目顧四方云天上天下唯吾獨尊後雲門云我當時若見一棒打殺與狗子喫貴圖天下太平。

拈云世尊初生信口捷言唯吾獨尊則不無天然氣概猶未在雲門須有背手抽金鏃且無翻身控角弓擊節山僧撿點將來亦似古廟師子虛開大口畢竟如何薄福闡提還不信自甘騎馬傍人門。

舉僧問九峰虔云承聞和尚有言諸聖間出祇是傳語人是否師曰是曰世尊一手指天一手指地云天上天下唯吾獨尊和尚為甚麼卻喚作傳語人曰祇為一手指天一手指地所以喚作傳語人。

拈云一對無孔鐵槌。

舉世尊初於臘月八日明星出時忽云奇哉一切眾生俱有如來智慧德相但以妄想執著不能證得。

拈云垛生招箭認賊為子雖然知恩者少負恩者多。

舉世尊一日陞座大眾纔集定文殊白椎云諦觀法王法法王法如是世尊便下座。

拈云一場敗闕。

舉世尊一日敕阿難食時將至汝入城持鉢難應諾曰汝既持鉢當依過去七佛儀式難遂問如何是七佛儀式佛召阿難難應諾佛曰持鉢去。

拈云世尊召阿難難應諾可謂上呼下應異口同音敢問諸人且道世尊用處與七佛是同是別良久云契券分明。

舉文殊師利令善財童子採藥云是藥者採將來善財遍採無不是藥卻來白云無不是者殊云是藥者採將來善財拈一枝草度與殊殊接得示眾云此藥能殺人亦能活人。

拈云文殊龍頭蛇尾善財逐惡隨邪撿點將來大小文殊為人錯下註腳善財合喫三十拄杖何故劍為不平離寶匣藥因救病出金瓶。

舉西天初祖摩訶迦葉尊者見世尊在靈山會上拈起一枝華以青蓮目普示大眾百萬聖賢悉皆罔措惟迦葉破顏微笑世尊乃曰吾有正法眼藏涅槃妙心實相無相微妙解脫法門付囑於汝汝當護持流通無令斷絕。

拈云世尊拈華人貧智短迦葉微笑馬瘦毛長若言吾有正法眼藏付囑摩訶迦葉也是空拳誑小兒。

舉迦葉因阿難問世尊傳金襴外別傳何物迦葉召阿難難應諾迦葉曰倒卻門前剎竿著。

拈云阿難合契山僧手中拄杖何故趕人不要趕上迦葉可謂沒量大人得饒人處且饒人山僧恁麼批判汝諸人還會麼若也未會拄杖子為汝指出遂以拄杖豎起復卓一下。

舉昔有古德一日不赴堂侍者請赴堂德曰我今日在莊上喫油糝飽者曰和尚不曾出入德曰汝去問莊主者方出門忽見莊主歸謝和尚到莊喫油糝。

拈云古德未出門喫油糝肚飽口皮何曾動侍者忽逢莊主明中暗暗中明還見侍者莊主麼二人原是舊相識祇如侍者謝莊主意作麼生莫信直中直須防仁不仁。

舉德山一日飯遲先托鉢下堂時雪峰作飯頭見便云這老漢鐘未鳴鼓未響拓鉢向甚麼處去師便歸方丈峰舉似巖頭頭曰大小德山未會末後句師聞令侍者喚來問汝不肯老僧那頭密啟其意師乃休去至明日陞堂果與尋常不同頭至僧堂前撫掌大笑曰且喜老漢會末後句雖然如是只得三年師果三年而沒。

拈云德山看風使帆雪峰相席打令撿點將來爭奈話作兩橛雪峰只解傳言送語不能懸崖返擲非但蹉過德山亦乃蹉過巖頭還知落處麼大冶精金應無變色。

舉文殊師利在靈山會上諸佛集處見一女子近佛坐入於三昧文殊白佛云何此女得近佛坐佛云汝但覺此女令從三昧起汝自問之文殊憐女子三匝鳴指一下乃至拓上梵天盡其神力而不能出佛云假使百千文殊亦出此女定不得下方過四十二恒沙國土有罔明菩薩能出此女定須與罔明至佛所佛敕出此女定罔明即於女子前鳴指一下女子於是從定而出。

拈云文殊置個問端從苗遍地瞿曇格外提持因語識人祇如文殊鳴指出女子定不得罔明鳴指因甚出得女子定且淆訛在甚麼處不見道不

是金牙作焉能射尉遲且道瞿曇與女子灑碧落有情空悵望瑤臺無路可追尋。

舉投子與僧遊山僧見蟬殼遂問殼在這裏蟬向甚麼處去師拈蟬殼就耳畔作蟬鳴聲其僧有省。

拈云投子赤體提持其僧全身擔荷且道擔荷個甚麼瞎驢蹄角相肖。臨濟示眾曰有一人論劫在途中不離家舍有一人論劫離家舍不在途中且道那一人合受人天供養。

拈云無手人行拳無腳人走路二俱不得動著動著則三十棒何故落花流水去空負浪游人。

舉臨濟因定上座問如何是佛法大意師下禪床擒住打一掌便托開定佇立傍僧云定上座何不禮拜定纔作禮忽然大悟。

拈云臥龍纔奮迅丹鳳便翱翔者僧錯下註腳合喫三十棒雖然且道悟個甚麼。

舉臨濟上堂次兩堂首座相見同時下喝僧問師還有賓主也無師云賓主歷然復召眾云要會臨濟賓主句問取堂中二首座。

拈云寐語作麼。

頌古

世尊初生。

一出門來復自吟指天指地何堪任周行七步渾如舊孰為瞿曇泥水深。僧問九峰。

世尊纔出摩耶腹華藏重重盡揭翻肝膽等閒俱烈破蟪蛄吞卻鐵崑崙。世尊睹明星。

不處皇宮坐雪山寒風霜重悴龍顏明星午夜忽然現兩眼豁開不等閒。世尊拈華。

拈華謂顯本源心平地休栽荊棘林水漲定應船自汎醞酸還有蚋爭尋。世尊陞座。

寶座陞陞萬仞高幾人斫額謾徒勞文殊椎下分明道撒手親須到一遭。世尊敕阿難持鉢。

邛州磁碗遂州鉢價重渾無物比倫莫道世間人不會一回拈出一回新。文殊令善財採藥。

善財便把草來呈度與文殊用得親毒藥醍醐行一道鐵石心腸亦愴神。女子出定。

文殊盡力枉施功女子端然坐定中唯有罔明機用密珠穿九曲一絲通。古德莊上喫油糝。

飽喫油糝更有誰口脣不動令人疑偶然莊主歸來謝侍者出門特見知。德山拓鉢。

父子零丁話似冰克由叵耐續傳燈承虛接響轉成錯疑殺古今癡鈍僧。

風穴上堂若立一塵家國興盛野老顰蹙不立一塵家國喪亡野老安恬於此明得闍黎無分全是老僧於此不明老僧卻是闍黎闍黎與老僧亦能悟卻天下人亦能瞎卻天下人欲識闍黎麼右邊一拍曰者裏是欲識老僧麼左邊一拍曰者裏是。

不立一塵自關襟宗綱解紐曷能尋若干頭角徒成隊獨角麒麟自冀金。

丹霞一日訪龐公見女子取菜次師曰居士在否女子放下菜籃斂手立師又問居士在否女便提籃去師回須臾公歸女舉前話公曰丹霞在麼曰去也公曰赤土塗牛妳。

招女攜籃取菜時丹霞特特訪龐耆莫言赤土塗牛妳萬象森羅解受持。本師七旬上堂毒鼓當軒擊法壇海印懸正明今日事觀面為昭宣茲者本師彌誕佳節七秩吉辰抑迺孟秋之際百穀成熟之時古柏恒新蒼松含翠頭頭顯露法法全彰豈拂子云看看此一著子能為萬象主不逐四時凋所以道唯一堅密身示現諸塵刹者裏若見得四眾臨筵祝本師壽已竟其或未委更聽偈言優曇現瑞示人天華萼清香遍大千劫外春秋師自得萬山聳翠壽山堅下座。

四喝。

一喝金剛王劍揮當陽無順亦無違試看倒用橫拈處忿怒那吒也失威。

一喝金毛踞地吼逐塊韓盧倒退走六聚魔軍悉遁藏一道威光射牛斗。

一喝探竿隨影草何待開口始傾倒張公喫酒醉李公不是現成非作造。

一喝不作一喝用直橫手面任擒縱回天轉地須臾間十聖三賢曷敢從。

四賓主。

賓中賓大千何處求纖塵況知無人兼無我全境全心滯網鱗。

賓中主觸境逢緣莫莽鹵地北天南話大行常在途中不出戶。

主中賓水到渠成亦未真居家不離途中事須知更有上頭津。

主中主萬里碧天紅日普一任橫該并豎抹二三四七非祖武。

三玄三要。

第一玄鷄過新羅萬八千誰謂寥寥天地內閭浮樹在海南邊。

第二玄神機出沒何超然向前未舉先知得直下洞然在目前。

第三玄妙明心印得真傳大千界在毫端上日用頭頭自顯然。

第一要百億須彌眼中照泥牛[跳-兆+孛]跳舞三臺石女溪邊拍掌笑。

第二要乾坤個隻眼睛照現成活計本無私萬別千差同一道。

第三要家家門首長安道分明歷歷為人揚累及無端成不了。

四料揀。

奪人不奪境沙界絕形影四海浪悉平長然天地靜。

奪境不奪人渾無物比倫舉拳交互處應不有疏親。

人境兩俱奪心法雙剔脫坐斷聖凡情不留朕兆個。

人境俱不奪橫該并豎抹瞥轉上頭關擒縱任殺活。

開鐘版祇這二上座萬古權衡佛祖千秋號令人天永振叢林真規悉皆內
嚴外肅今日承先起後一槌兩當遂擊云圓通大啟無回互直聽雷音震大
荒。

聯芳

天序能上人(湖廣)

從上門庭克荷任光明輝耀濟宗燈燈燈接續燈燈燄振起道風冠古今

機先瑩上人(湖廣)

西來祖印獲親傳分付隨方闡化權嚙鏃一機能倒用湖海衲子一捲攣

次韻山居

茂林修竹即清涼謹對流泉智水長活鱗源頭無曉夜萬方寧靜屬仁皇
掀翻海嶽絕溫涼捩轉乾坤日腳長拄地撐天橫宇宙寰中天子一熙皇
樓臺殿閣生微涼鼓角鐘聲喚夢長驚惺參禪物外客明明無隱徹天皇

山中四儀

山中行七尺烏藤倒嶽傾多少風光觀不盡青松白石少枯榮
山中住地僻絕通車馬路不許時人知我居無端花逐水流出
山中坐面對奇峰雲尚破疑殺神頭鬼面人來朝不會那句箇
山中臥而恒處此菩提座枕兒墮地笑呵呵拈起示顰幾許大

牧牛頌

尋牛

徐徐獨步入嶠尋萬壑千谿路轉深行到水窮山盡了磯流枯處始聞音

見跡

覲面相呈見也麼分明頭角擬多羅橫身三界摩天背無限途中更覓他

見牛

驚天動地恣哮聲戴角披毛非紫青落落襟懷奚坦蕩原來面目自生成

得牛

頭角完全祇者渠聖名凡號盡蠲除相逢狹路呈端的驀鼻牽來家裏居

牧牛

山童慵力近其身豎四橫三迴絕塵鼻孔撩天慢牽著風流舉世箇牛人

騎牛到家

千盤路轉騎歸家萬疊峰巒斂綠霞縱有回天轉地力逢人慢莫巨張牙

忘牛存人

幽然孤坐大雄山頂後神光孰敢攀一著更能超佛祖寸絲不挂在人間

人牛俱忘

要識真空本不空卻將消息為君通從來絕待無依倚挂角羚羊豈有蹤

返本還源

宏機密用沒動功合豎降旗在下風列聖規繩箇面目巍然一喝耳雙聾

入廛垂手

早從那畔印心來阜角燈心鋪慣開如此話頭重舉起石人笑豁半邊腮

十二時歌

半夜子空王殿裏無知己朝來日出扶桑東觀體提持微妙旨
雞鳴丑一任橫行并豎走八面玲瓏處處通眾星隱顯稽束手
平旦寅闌干雞唱驀翻身朝來起坐渾如舊天岸奔騰五色麟
日出卯一輪圓滿當天曉十方世界利群生箇箇自明衣裏寶
食時辰龍象滿堂轉食輪饅飯飽餐唯一句若言一句疑殺人
禺中巳倒握竹篴為直指觸背非遮明舉揚提持當面要人委

日南午光耀大千沙界普無古無今照世間平眇諸方吞佛祖
日昃未堂堂來往向人謂光陰疾速苟如知兩眼昏花可懼畏
晡時申百鳥噪林氣象新露柱堂前開活眼金毛獅子解翻身
日入西漁舟唱晚宿堤柳從茲更不藏頭角一一面南看北斗
黃昏戌歷歷明明黑似漆光境俱忘大脫空摩訶般若波羅密
人定亥豁開夢眼誰堪對人人聰性莫咨詢紙燭滅時百雜碎

黃龍三關

我手佛手共舒一抬一搦如如橫按莫邪正令寰宇斬癡任渠
我腳驢腳并行閻浮世界坦平不消警欬蹋遍雲外青山縱橫
人人盡有生緣覲面發機現前自古至今烜赫威光廓顯歷然
智覃正禪師語錄卷(終)

助緣耆德(通一)

眾弟子 (最清 德洪

性弘 實忍

實信 實靈

實性 實敞

實照 尚榮

實炯 尚能

如心 尚景

德極 修誠

德會 宗弘)

尼弟子 (實相實真)

同發心各捐資刻

智覃正禪師語錄一部用廣流通伏願人人悟明白

性各各洞徹根源廓正法眼輝佛祖燈謹識

康熙甲子歲八月 日吉旦禾郡楞嚴寺藏板

樵李吳知先敬書

禾郡馬三錫繡梓

CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）

[前往捐款](#)

劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
